


Pengantar PERUNDANGAN ISLAM

Abd. Jalil Borham



Edisi Pertama 2002
© ABD. JALIL BORHAM 2002

Hak cipta terpelihara. Tiada dibenarkan mengeluarkan mana-mana bahagian artikel, ilustrasi, dan isi kandungan buku ini dalam apa juga bentuk dan cara apa jua sama ada dengan cara elektronik, fotokopi, mekanik, atau cara lain sebelum mendapat izin bertulis daripada Timbalan Naib Canselor (Pembangunan & Perancangan Korporat), Universiti Teknologi Malaysia, 81310 Skudai, Johor Darul Ta'zim, Malaysia. Perundingan tertakluk kepada perkiraan royalti atau honorarium.

Perpustakaan Negara Malaysia

Data Pengkatalogan-dalam-
Penerbitan

Abd. Jalil Borham

Pengantar perundangan Islam / Abd. Jalil Borham.

Mengandungi indeks

Bibliografi : ms. 139-146

ISBN 983-52-0276-1

1. Islamic law--History. 2. Islamic law--Interpretation and construction.

I. Judul.

340.59

Editor: HUSIN SALAMON
Pereka Kulit: ZALAWATI SUFIAN

Diatur huruf oleh / *Typeset by*
PANTAS SET SDN. BHD.,
6A, Jalan Pandan 2/1,
Pandan Jaya, Cheras,
55100 Kuala Lumpur, MALAYSIA.

Diterbitkan di Malaysia oleh / *Published in Malaysia by*
PENERBIT

UNIVERSITI TEKNOLOGI MALAYSIA
34 – 38 Jalan Kebudayaan 1,
Taman Universiti,
81300 Skudai,

Johor Darul Ta'zim, MALAYSIA.

(PENERBIT UTM anggota PERSATUAN PENERBIT BUKU MALAYSIA/
MALAYSIAN BOOK PUBLISHERS ASSOCIATION dengan no. keahlian 9101)

Dicetak di Malaysia oleh / *Printed in Malaysia by:*

CETAK RATU SDN. BHD.,
No. 12, Jalan Permatang,
Taman Desa Jaya,
81100 Johor Bahru
Johor Darul Ta'zim, MALAYSIA.

RM16.00

ISI KANDUNGAN

<i>Kandungan</i>	v
<i>Kata Pengantar</i>	ix
<i>Singkatan</i>	xi
<i>Senarai Kes</i>	xiii

BAB 1

Pengenalan Kepada Undang-Undang Islam

1.0	Pendahuluan	1
1.1	Erti Undang-Undang Islam	2
1.2	Definisi Syariah	2
1.3	Definisi Fiqh	8
1.3.1	Fiqh di Zaman Sahabat dan Tabi'in	10
1.3.2	Fiqh Sesudah Abad Kedua dan Ketiga Hijrah	11
1.4	Kesimpulan	12

BAB 2

Keistimewaan Undang-Undang Islam

2.0	Pendahuluan	13
2.1	Ciri-ciri-Keistimewaan Undang-Undang Islam	14
2.1.1	Ketuhanan (<i>Rabbaniyyah</i>)	14
2.1.2	Universal (<i>Alamiyyah</i>)	17
2.1.3	Menyeluruh (<i>Syumuliyyah</i>)	20
2.1.4	Keaslian dan Keabadian	23
2.1.5	Menghilangkan Kesulitan dan Mendatangkan Kemudahan	25
2.1.6	Memelihara Kemaslahatan (kepentingan) Manusia	27

2.1.7	Keseimbangan Kebendaan dan Kerohanian	30
2.1.8	Hubungan Erat (<i>talazum</i>) antara Akidah dengan Kehidupan	32
2.2	Perbezaan Antara Syariah Dengan Undang-Undang Sivil	34
2.2.1	Mempunyai <i>Rabbaniyyah</i> (ketuhanan)	35
2.2.2	Memusat <i>Tarbiyah</i> Pada Akhlak	36
2.2.3	Penekanan Pada Pembaikan <i>Akidah Rabbaniyyah</i>	38
2.3	Kesimpulan	39

BAB 3

ASAS PEMBINAAN UNDANG-UNDANG ISLAM

3.0	Pendahuluan	41
3.1	Sumber Perundangan Islam	41
3.1.1	Al-Qur'an	41
3.1.1.1	Definisi al-Qur'an	42
3.1.1.2	Pemansuhan Dalam Hukum (Nasakh dan Mansukh)	44
3.1.2	Al-Sunnah	47
3.1.3	Al-Ijma'	49
3.1.4	Al-Qiyas	50
3.1.5	Al-Istihsan	51
3.1.6	Al-Masalih Al-Mursalah	52
3.1.7	Al-'Uruf	53
3.1.8	Al-Istishab	53
3.1.9	Syariat sebelum Islam (<i>Syar'u Man Qablana</i>)	54
3.1.10	Mazhab (pendapat) Para Sahabat	55
3.2	Kesimpulan	55

BAB 4

SEJARAH PERTUMBUHAN UNDANG-UNDANG ISLAM DAN PERKEMBANGANNYA

4.0	Peringkat Perundangan Di zaman Rasulullah s.a.w	57
4.1	Perundangan Di Mekah	58
4.2	Perundangan Di Madinah	60

4.3	Perkembangan Kuasa Perundangan Islam	68
4.4	Kesimpulan	75

BAB 5

SEJARAH PERUNDANGAN ISLAM DI TANAH MELAYU

5.0	Pendahuluan	77
5.1	Tempat Terawal Pertapakan Islam	77
5.2	Kerajaan Melayu Islam Melaka	82
5.3	Undang-Undang Melaka	84
5.4	Kesimpulan	96

BAB 6

KEDUDUKAN UNDANG-UNDANG ISLAM DALAM PERLEMBAGAAN PERSEKUTUAN

6.0	Pengenalan	97
6.1	Latar belakang Perlembagaan Persekutuan	98
6.3	Kedudukan Islam Dalam Perlembagaan Persekutuan	101
6.4	Mahkamah Syariah dan Bidangkuasanya	115
6.5	Pindaan Perkara 5 dan 121 Perlembagaan Persekutuan	121

BAB 7

JENIS-JENIS KESALAHAN DAN HUKUMANNYA DALAM UNDANG-UNDANG ISLAM

7.0	Pendahuluan	125
7.1	Hukuman Hudud	125
7.2	Jenayah Hudud	126
7.2.1	Zina	126
7.2.2	Qazf	127
7.2.3	Syurb	128
7.2.4	Sariqah	128
7.2.5	Hirabah	130
7.2.6	Irtidad atau Riddah	131

viii *Kandungan*

7.2.7	Baghy	132
7.3	Hukuman Qisas dan Diyat	132
7.3.1	Qisas	132
7.3.2	Diyat	134
7.4	Ta'zir	135
7.5	Kesimpulan	138

Bibliografi	139
--------------------	-----

Indeks	147
---------------	-----

KATA PENGANTAR

Dengan nama Allah dan pada-Nya segala pujian dan kesyukuran. Selawat dan salam sejahtera ke atas junjungan Nabi Muhammad s.a.w dan bagi keluarga dan sahabat baginda serta mereka yang menurut sunnahnya sampai ke hari penentuan.

Berkat taufik dan hidayah dari Allah S.W.T, saya dapat menyediakan buku berjudul "*Pengantar Perundangan Islam.*" Buku ini bertujuan untuk memberi gambaran ringkas mengenai definisi undang-undang Islam meliputi pengertian fiqh dan syariah. Ia juga menghuraikan ciri-ciri keistimewaan undang-undang Islam dan perbezaan antara syariah dengan undang-undang sivil. Juga diterangkan tentang asas pembinaan undang-undang Islam dan sejarah ringkas perkembangan undang-undang Islam sejak awal pertumbuhannya hingga ke hari ini.

Pembaca buku ini akan dapat mengenal dengan lebih dekat mengenai sejarah perundangan Islam di Tanah Melayu dan tempat terawal pertapakan Islam dan pelaksanaan undang-undangnya. Tumpuan diberikan kepada Undang-Undang Melaka dan pengaruh pelaksanaan undang-undang tersebut di Nusantara. Kedudukan undang-undang Islam dalam Perlembagaan Persekutuan juga turut disentuh untuk menerangkan keadaan sebenar undang-undang Islam selepas kemerdekaan Tanah Melayu. Seterusnya diuraikan secara ringkas penubuhan mahkamah-mahkamah syariah di Malaysia dan bidang kuasanya.

Akhirnya penulis turut menghuraikan skop undang-undang jenayah Islam dalam aspek jenis-jenis kesalahan dan hukumannya menurut nas al-Qur'an dan al-Sunnah. Ia meliputi hukuman bagi kesalahan jenayah hudud, qisas dan ta'zir sebagai panduan umum tentangnya.

Buku ini amat sesuai dibaca oleh para pelajar di Institusi Pengajian Tinggi khususnya bagi subjek *Pengantar Syariah & Perundangan* dan Institusi-Institusi Islam dalam kursus *Tamadun Islam*. Di samping itu, buku ini juga sesuai dibaca oleh setiap lapisan masyarakat terpelajar.

Akhirnya, saya memohon jutaan kemaafan di atas segala kesilapan dan kekurangan yang berlaku, anggaplah ia sebagai kelemahan diri saya sendiri. Semoga Allah S.W.T memberi keredaan dan keberkatan kepada semua pihak yang terlibat.

Prof. Madya Dr. Abd. Jalil bin Borham

Pusat Pengajian Islam dan Pembangunan Sosial,
Universiti Teknologi Malaysia,
Skudai, Johor.

2002

SINGKATAN

Bil.	Bilangan
DBP	Dewan Bahasa dan Pustaka
dll.	dan lain-lain
DYMM	Duli Yang Maha Mulia
Ed.	Edisi
ed.	edit
<i>etc.</i>	<i>et cetera</i> , and so forth
F.M.S	<i>Federated Malay States</i>
F.M.S.L.R	<i>Federated Malay States Law Report</i>
Govern.	<i>Government</i>
hal.	halaman
H	Hijrah
<i>Ibid</i>	<i>ibidem</i> , In the same place
hb.	haribulan
Int.	<i>International</i>
JIAEA	<i>Journal of The Indian Archipelago and East Asia</i>
Jil.	Jilid
JMBRAS	<i>Journal of the Malayan Branch Royal Asiatic Society</i>
JMCL	<i>Journal of Malaysian & Comparative Law</i>
JPM	Jabatan Perdana Menteri
Ltd.	<i>Limited</i>
M	Masihi
MBRAS	<i>Malayan Branch Royal Asiatic Society</i>

xii *Singkatan*

MCA	<i>Malaysian Chinese Association</i>
MIC	<i>Malaysian Indian Congress</i>
M.L.J	<i>Malayan Law Journal</i>
M.L.R	<i>Malayan Law Review</i>
M.R	<i>Malayan Report</i>
MSRI	<i>Malaysian Sociological Reserch Institute</i>
no.	nombor
<i>op. cit</i>	<i>opere citato, In the work cited</i>
Ord.	Ordinan
P.C	<i>Privy Council</i>
Per.	Perkara
Pt.	<i>Part</i>
Q.B	<i>Queen's Bench Division</i>
s.a.w	SalalLahu 'Alaihi Wasallam
S.S	Strait Sattlement
S.W.T	Subhanahu Wa Ta'ala
T.M	Tanah Melayu
U.F.M.S	<i>Unfederated Malay States</i>
UMNO	<i>United Malays National Organization</i>
vol.	<i>volume</i>
YDA	Yang DiPertuan Agong

SENARAI KES

<i>Abdul Fata Mohammad Ishak</i> lawan <i>Rasamaya Dhur Dhowdhury</i> (1894) A.R 1A 76.	...120
<i>Ainan</i> lawan <i>Syed Abu Bakar</i> (1939) M.L.J 201.	...119
<i>Che Omar bin Che Soh</i> lawan <i>Pendakwaraya</i> (1988) 2 M.L.J 55 (Mahkamah Agong).	...104
<i>Fatima binte Mohammad</i> lawan <i>Bahshuwen</i> (1952) A.C.I.	...120
<i>Inre Susie Teoh</i> lawan <i>Kadi Pasir Mas & Majlis Agama Islam dan Adat Istiadat Melayu Kelantan</i> (1986) 2 M.L.J 228.	...111
<i>Mariam</i> lawan <i>Mohd Arif</i> (1971) 1 M.L.J 265.	...117
<i>Menteri Hal Ehwal Dalam Negeri</i> lawan <i>Jamaluddin bin Othman</i> (1939) 1 M.L.J 398.	...106
<i>Nafsiah</i> lawan <i>Abdul Majid</i> (1969) 2 M.L.J 174.	...118
<i>Ratilal Panchand</i> lawan <i>State of Bombay</i> (1954) S.C.R 1055.	...107
<i>Tengku Mariam</i> lawan <i>Commissioner for Religious Affairs, Terengganu</i> (1970) 1 M.L.J 222.	...119

1

PENGENALAN KEPADA UNDANG-UNDANG ISLAM

1.0 PENDAHULUAN

Manusia tidak boleh hidup bersendirian. Ia memerlukan antara satu sama lain untuk meneruskan kehidupan dan memenuhi keperluan masing-masing. Menurut pendapat ahli kemasyarakatan, manusia adalah makhluk sosial dan makhluk yang menurut sifat pembawaannya bermasyarakat. Maka hidup bermasyarakat itu adalah satu keperluan kepadanya.¹ Untuk menjaga hubungan dan keperluan anggota masyarakat, perlulah ada peraturan yang dapat mengawal dan mengatur-cara hidup serta memelihara suasana semoga semuanya dapat berjalan dengan baik dan saksama. Menurut Geogfrey Sawer, kajian sejarah dan arkeologi membuktikan bahawa masyarakat manusia dari kumpulan-kumpulan manusia yang kecil dan sederhana hingga kepada masyarakat manusia yang moden dan serba kompleks, memiliki batas-batas kaedah atau peraturan yang menjamin kelangsungan hidup mereka.² Sebelum kedatangan *syariah Islam* masyarakat manusia hidup berpandukan peraturan-peraturan yang mereka cipta yang diambil daripada amalan adat dan agama. Dalam al-Qur'an Allah S.W.T berfirman yang bermaksud;

*"Untuk tiap-tiap umat antara kamu, Kami berikan aturan (syariah) dan sistem tertentu."*³

¹ Mahmassani, S. 1961. *Falsafat al-Tashri' fi al-Islam*. Beirut, hal. 14.

² Geogfrey Sawer. 1965. *Law of Society*. OUP, hal. 27-28.

³ Al-Qur'an, surah *al-Ma'idah*: ayat 48.

2 Pengantar Perundangan Islam

Tidaklah keterlaluan jika kita menganggap bahawa setiap bangsa atau negara di dunia ini mempunyai peraturan atau undang-undangnya sendiri. Secara kasar undang-undang dapat dibahagikan kepada dua bahagian; iaitu *undang-undang ciptaan manusia* dan *undang-undang ciptaan Allah*. Ini diperakui oleh J.Austin seorang tokoh undang-undang Barat.⁴

1.1 ERTI UNDANG-UNDANG ISLAM

Untuk mengenali undang-undang Islam, kita perlu memahami terlebih dahulu dua istilah yang sering disebut berkaitan undang-undang Islam. Istilah-istilah itu ialah:

1. *Al-Syariah al-Islamiah* atau Syariah; dan
2. *Al-Fiqh al-Islam* atau Hukum Fiqh Islam.

Kedua-dua istilah tersebut pada umumnya membawa erti undang-undang tetapi jika dihalusi ternyata bahawa *al-Syariah al-Islamiah* itu lebih umum dan meluas dari *al-Fiqh al-Islam*.

1.2 DEFINISI SYARIAH

Syariah dari segi bahasa bermaksud *jalan yang lurus*, seperti firman Allah S.W.T yang bermaksud,

*“Kemudian Kami jadikan kamu di atas suatu jalan yang lurus (syariah) maka hendaklah kamu mengikutinya dan jangan sekali-kali mengikut kehendak mereka yang tidak mengetahui.”*⁵

Ia juga diertikan sebagai saluran air yang mengalir yang menjadi sumber minuman.⁶ Dari segi istilah ia bermaksud hukum-hakam yang diperundangkan Allah ke atas hamba-Nya supaya mereka beriman

⁴ Dias R. W. M. 1970. *Jurisprudence*. London: Butterworth, hal. 390.

⁵ Al-Qur'an, surah *al-Jathiah*: ayat 18.

⁶ Ibrahim Dasuki al-Syahawi. 1970. *Tarikh Tasyri al-Islam*. Cairo, hal. 6.

dan beramal dengan-Nya agar membawa kepada kebahagiaan hidup di dunia dan di akhirat.⁷ Ini bererti bahawa *syariah Islamiah* itu ialah peraturan atau undang-undang Allah yang diturunkan kepada manusia, meliputi setiap urusan kehidupan manusia termasuk aspek akidah (kepercayaan), *syariah* (perundangan dan mu'amalat) dan juga akhlak. Hukum-hukum ini dinamakan *syariah* kerana kedudukannya yang lurus, sistemnya yang benar tidak menyimpang dari tujuan asal penurunannya. Oleh itu, dapat diambil kesimpulan bahawa perundangan itu meliputi perkara membuat undang-undang, menjelaskan hukum-hakam dan mengadakan peraturan-peraturan.

Berdasarkan kepada definisi di atas, *syariah Islam* mempunyai ciri-ciri berikut:

- (i) Pencipta undang-undang
- (ii) Hukum (perintah)
- (iii) Hamba
- (iv) Himpunan iman dan amalan
- (v) Kehidupan di dunia dan di akhirat (bidang kuasa)

Syariah Islam terdiri daripada hukum-hakam yang diperundangkan oleh Allah S.W.T melalui rasul-Nya, sama ada apa yang terkandung dalam al-Qur'an atau al-Sunnah. Di samping itu, segala hukum yang ditentukan melalui ijtihad sahabat dan fuqaha' yang berdasarkan kepada dua sumber utama tersebut ada sebahagian dari *syariah Islamiah*. Ternyata di sini yang memperundangkan suatu hukum itu adalah Allah S.W.T semata-mata. Dialah pencipta undang-undang dan yang mempunyai kuasa tertinggi dan memiliki kuasa mutlak. Apa jua hukum dalam *syariah Islam* tidak boleh terkeluar dari apa yang telah ditetapkan oleh dasar-dasarnya. Perkembangan *syariah Islam* hanya boleh dilakukan melalui ijtihad dan ijtihad itu pula mestilah memenuhi syarat-syaratnya. Ini menunjukkan perbezaannya yang nyata berbanding konsep undang-undang ciptaan manusia.

⁷ *Ibid.*

Undang-undang ciptaan manusia adalah merupakan suatu peraturan yang dibuat untuk dijadikan panduan oleh suatu badan tertinggi yang mempunyai kuasa ke atas golongan tertentu.⁸ Ia meletakkan kuasa membuat undang-undang itu pada manusia dalam menjalankan proses undang-undang untuk satu badan yang mempunyai kuasa politik tertinggi di mana padanya terletak kuasa kedaulatan.⁹ Oleh itu, dalam pengertian ini, mana-mana juga peruntukan atau bahagian undang-undang boleh diperbuat jika dan apabila badan ini merasakan perlu. Jika negara itu mempunyai perlembagaan, apa jua undang-undang ciptaan yang bercanggah dengan perlembagaan boleh dipinda oleh perlembagaan tersebut. Ternyata di sini yang membataskan undang-undang daripada diperbuat adalah perlembagaan. Dengan itu wujudlah doktrin *ultra vires*.¹⁰

Kehendak manusia dalam memperbuat apa jua bentuk undang-undang tidaklah terbatas kerana perlembagaan itu sendiri boleh dipinda. Ini sudah pasti berlainan sekali dengan al-Qur'an dan al-Sunnah sebagai sumber *syariah Islam*. Manusia tidak dapat memindahkannya dan mesti patuh kepadanya. Oleh itu, dalam perundangan Islam, sebarang undang-undang yang digubal tidak boleh sama sekali bercanggah dengan dua sumber utama tersebut. Jika berlaku percanggahan maka bahagian itu dinamakan *ultra vires*. Sebagai contoh, jika judi itu haram, maka selama-lamanya haram. Berlainan dengan undang-undang ciptaan manusia, ada judi salah di sisi undang-undang dan ada judi yang dibenarkan oleh undang-undang.

Golongan yang dimaksudkan oleh *syariah Islam* supaya mematuhi perintah-Nya ialah manusia dan jin. Ini dapat dilihat dalam firman Allah S.W.T yang bermaksud;

*"Dan Aku tidak menciptakan jin dan manusia melainkan supaya mereka menyembah Aku."*¹¹

⁸ Dias, R. W. M, *op-cit*, hal. 389.

⁹ Llyod, L. 1972. *Introduction to Jurisprudence*. London: Steven & Son, hal. 214.

¹⁰ *Ultra vires* bermaksud bercanggah dengan undang-undang yang lebih tinggi. Lihat Jennings, Sir. 1976. *The Law and the Constitution*. (5 Ed) London: H &D, hal. 144.

¹¹ Al-Qur'an, surah *al-Dhariyyat*: ayat 56.

Dalam hubungan ini dibataskan huraianannya tentang kepatuhan manusia kepada hukum Allah. Kepatuhan dalam erti kata menjalankan perintah atau suruhan (wajib atau sunat) dan menjauhkan diri daripada perkara-perkara larangan (haram dan makruh) dan memberi pilihan dalam melakukan perkara-perkara yang harus. Kepatuhan ini diikuti selagi manusia mampu dan tiada halangan syara' walau di mana jua mereka berada; tanpa mengira seseorang itu berada di dalam negara Islam mahupun bukan negara Islam.

Hukuman Allah berkuat kuasa tanpa batas sempadan daerah dan negeri. Berada dalam negara yang tidak menjalankan hukum Allah bukan bererti bebas melakukan perkara-perkara yang tidak diperundangkan di negara tersebut. Dalam erti kata lain bidang kuasa hukum Allah tidak terbatas kerana hukum Allah adalah hukum untuk manusia dan alam sejagat. Ini bersesuaian dengan firman Allah S.W.T yang bermaksud;

*"Tidak Aku utus engkau (Muhammad) melainkan membawa rahmat kepada alam seluruhnya."*¹²

Undang-Undang ciptaan adalah diperbuat dari manusia kepada manusia. Dalam undang-undang ini pada amnya setiap orang adalah sama taraf dari sisi undang-undang. Namun terdapat juga golongan yang dikecualikan daripada tindakan mahkamah. Ini biasanya diperuntukkan dalam perlembagaan sesebuah negara. Dalam *syariah Islam* tiada seorang pun terkecuali daripada undang-undang, walau Rasulullah s.a.w sendiri. Undang-undang itu pula disokong oleh pelaksanaan hukuman ke atas pelanggar atau pesalah. Tanpa hukuman, undang-undang sukar dipatuhi. Hukuman itu pula tidak semestinya berbentuk dendaan atau hukuman berat seperti hukuman rotan atas balas bunuh, tetapi boleh dalam bentuk sekatan ke atas kebebasan seseorang.¹³ Oleh itu, kepatuhan dituntut selama undang-undang itu belum dibatal atau dipinda.¹⁴

¹² Al-Qur'an, surah *al-Anbiya*: ayat 107.

¹³ Llyod, L. *op. cit*, hal. 274.

¹⁴ Hart H. L. A. 1975. *The Concept of Law*. Oxford. Oxford University, hal. 23.

Parlimen dikatakan badan memperbuat undang-undang kerana ia mempunyai kuasa membuat atau tidak membuat undang-undang.¹⁵ Bagi negara-negara yang mempunyai perlembagaan maka ia tertakluk pada bidang kuasa yang diperuntukkan. Di samping itu, parlimen hanya boleh memperbuat undang-undang bagi kawasan tertentu. Sesebuah negara tidak boleh memperbuat peruntukan undang-undang bagi negara yang lain.¹⁶

Undang-undang diadakan supaya manusia mematuhiinya, baik di hadapan pihak berkuasa undang-undang atau sebaliknya. Dalam erti kata lain, manusia atau rakyat dikehendaki bertindak dan beramal mengikut undang-undang. Apabila tindakan manusia mengikut kehendak undang-undang, hak diri sendiri dan hak orang lain akan terkawal. Namun dalam kehidupan, manusia kadang-kala bertindak menyalahi undang-undang jika ia merasa terselamat dari tindakan atau merasakan pihaknya dapat melakukan sesuatu untuk mengatasi kesalahan yang telah dilakukan. Lebih jauh dari itu, manusia tidak dikehendaki beriman dengan kebaikan undang-undang itu dan bidang kuasa undang-undang itu pula terbatas pada kawasan tertentu sahaja.

Kedudukan ini berlainan sekali dengan syariat Islam. Manusia dikehendaki mematuhiinya di mana sahaja mereka berada. Manusia juga dikehendaki mematuhi sama ada di hadapan penguatkuasa undang-undang atau sebaliknya. Sungguhpun tidak semua negara di dunia ini melaksanakan *syariat Islam*, ini bukan bererti *syariah Islam* tidak berkuasa atau membuka peluang bagi penganut Islam melanggar hukum Islam di negara bukan Islam. Dalam hubungan ini mereka yang melanggar hukum Allah pasti dihukum walau di mana kesalahan itu dilakukan. Hukuman itu sama ada di dunia, jika dikuatkuasakan, ataupun di akhirat. Oleh itu, terdapat dalam syariat Islam apa yang dipanggil *dosa* dan *pahala*. Konsep-konsep dosa dan pahala tidak terdapat dalam perundangan ciptaan manusia. Di sini jelas menunjukkan faktor akidah berhubung erat dengan tindak-tanduk manusia. Atas dasar inilah, orang Islam tidak dibenarkan mencemuh mana-mana bahagian yang ditetapkan oleh Allah S.W.T.

¹⁵ Jennings, I, *op. cit.*, hal. 144.

¹⁶ Hart H. L. A, *op. cit.*, hal. 25.

Ternyata bahawa pengertian undang-undang Islam tidak boleh disamakan dengan pengertian undang-undang manusia yang didefinisikan oleh ahli undang-undang Barat.¹⁷ Dengan kata lain, kita tidak boleh memahami *syariah Islam* dengan menggunakan kaedah atau definisi Barat.¹⁸ Walau bagaimanapun, hari ini kita memahami *syariah Islam* sebagaimana orang Barat mendefinisikannya.

Mengenai bidang kuasa *syariah Islam*, ia tidak ada batasnya, kerana yang mencipta dan memperundangan sesuatu atau hukum itu ialah Allah S.W.T sendiri. Dialah pembuat undang-undang tertinggi (*Sovereign Legislator*). Oleh kerana dunia ini Allah yang menciptanya, maka undang-undang yang ditetapkan-Nya tidak mempunyai batas masa dan tempat. Bahkan ia berkuat kuasa hingga hari akhirat. Ini adalah satu keunikan dalam konsep perundangan Islam. Dengan adanya bidang kuasa yang tidak terbatas bererti undang-undang itu sendiri diperakui sah dan berkuasa di mana jua, baik di timur ataupun di barat walaupun penduduk tempatan tidak memperakui kedaulatan undang-undang Islam.

Ini membawa erti bahawa setiap orang yang memperakui dirinya *muslim* tertakluk kepada undang-undang Islam walaupun di mana jua mereka berada. Ini kerana dalam Islam konsep *sovereignty* itu hanya pada Allah, bukan pada parlimen¹⁹ seperti di England, dan bukan pada perlembagaan seperti kedudukan perlembagaan di negara-negara yang mempunyai perlembagaan bertulisnya sendiri.

Adalah menjadi satu amalan dalam perundangan bahawa sesuatu undang-undang itu hanya boleh dipinda atau dimansuh oleh badan atau institusi yang memperbuatnya. Ini memberi erti jika sesuatu undang-undang itu diperbuat di parlimen maka hanya parlimen sahaja

¹⁷ Menurut J. Austin, undang-undang yang diperakui sah dilaksanakan ialah apa yang tergolong dalam bahagian *Positive Law*.

¹⁸ Anderson, J. N. D. 1976. *Law Reform in the Muslim World*. Oxford: Oxford University, hal. 3.

¹⁹ Keterangan tentang Parlimen di England, lihat Jennings I, Sir, *The Law of The Constitution*, hal. 137-142, Smith, S. A. 1978. *Constitutional Law and Administrative Law*. England: Peguin, hal. 63-64.

berkuasa meminda atau menghapuskan undang-undang tersebut, bukan badan atau institusi di bawahnya. Jika kuasa memperbuat undang-undang itu dipindahkan atau diwakilkan kepada suatu badan, maka badan tersebut hanya berkuasa dalam bidang yang ditetapkan. Jika badan tersebut melewati atau terkeluar daripada bidang kuasa yang diperuntukkan maka ia dianggap sebagai *ultra vires* kuasa yang diberi dan ia terbatal.

1.3 DEFINISI FIQH

Ada ulama memahami *syariah* itu sama erti dengan *fiqh*.²⁰ Pendapat ini tidak tepat kerana *syariah* memberi pengertian yang lebih umum daripada *fiqh*. *Syariah* mencakupi setiap perkara yang diperundangkan oleh Allah sama ada tentang akidah, menyentuh hubungan antara manusia dengan Penciptanya seperti ibadat solat dan cara hidup manusia sesama manusia seperti akhlak dan sebagainya.

Fiqh dari segi bahasa bermaksud *kefahaman*, seperti firman Allah S.W.T yang bermaksud; “*Dan hati-hati mereka yang telah dikunci maka merekapun tidak mengerti.*”²¹ Dari segi istilah, iaitu ilmu tentang hukum-hakam syara’ yang amali dan praktikal yang diambil daripada dalil-dalilnya yang *tafsili* (terperinci).²² Ia bermaksud mengetahui dan memahami hukum-hukum syara’ yang berhubung dengan perbuatan-perbuatan manusia yang mukallaf, sama ada yang berhubung dengan amal ibadat, kira bicara atau kehakiman dan sebagainya. Dengan itu jelaslah undang-undang Islam telah ditetapkan Allah S.W.T dalam al-Qur’an dan hadis-hadis Rasulullah s.a.w dan Dia sebagai “*Legislator.*” Ayat-ayat al-Qur’an pada kebiasaannya memberi erti yang terlalu umum dan menyeluruh. Oleh itu, suatu tafsiran yang terperinci perlu dibuat untuk lebih memahami ayat-ayat tersebut. Apabila sesuatu tafsiran dibuat oleh ahli-ahli yang pakar yang akhirnya menghasilkan suatu hukum cabang dari suatu ayat yang umum, maka perkara tersebut dinamakan *fiqh*.

²⁰ Dr. Mohd. Yusof Musa (1958), *Madkhal li Dirasah al-Fiqh al-Islami*. Cairo, hal. 9.

²¹ Al-Qur’an, surah *al-Taubah*: ayat 87.

²² Muhammad bin Hassan (t.t), *Syarh al-Badashi*. vol. 1, Cairo, hal. 19.

Fiqh merupakan suatu ilmu yang hidup. *Fiqh* berkembang dan meluas seperti mana juga berkembangnya kegiatan manusia. *Fiqh* adalah undang-undang sampingan yang dipecahkan daripada undang-undang asasi atau *fiqh* merupakan tafsiran-tafsiran daripada undang-undang umum. Oleh itu, suatu yang dihasilkan oleh ilmu *fiqh* merupakan peraturan lanjutan atau pecahan daripada undang-undang dasar Islam itu sendiri. Hukum-hukum Islam seperti yang terdapat dalam al-Qur'an selama-lamanya tidak berubah dan tidak boleh sama sekali diubah dan dipinda. Hukum-hukum tetap kekal hingga ke hari kiamat. Sebahagian hukum-hukum dalam al-Qur'an adalah hukum-hukum yang umum. Untuk mengkhususkan hukum-hukum itu dan mentafsirkannya dengan cara yang rasional adalah tugas pakar perundangan atau ahli *fiqh* (*fuqaha'*). Oleh yang demikian, hukum-hukum *fiqh* sentiasa berkembang dan kadang-kadang berubah dari masa ke semasa dan dari satu keadaan ke satu keadaan yang lain asalkan hukum-hukum itu tidak berlawanan dengan hukum-hukum asal dalam al-Qur'an dan al-Sunnah.

Hasil dari perkembangan hukum *fiqh* yang merupakan sedutan dari hukum al-Qur'an melalui penghuraian *fuqaha'* maka lahirlah aliran-aliran hukum yang berbagai-bagai. Aliran yang dimaksudkan dikenali pada hari ini sebagai mazhab-mazhab *fiqh*. Aliran ini lahir apabila sesuatu yang tidak terdapat dengan jelas di dalam al-Qur'an diikuti dengan pentafsiran yang berbagai-bagai bentuk berdasarkan kaedah pentafsiran hukum yang diakui bersama. Semua yang tersebut itu adalah merupakan undang-undang Islam yang diakui benarnya oleh ahli perundangan Islam. Ini adalah kerana hukum-hukum itu tidak terkeluar daripada kehendak al-Qur'an. Oleh yang demikian undang-undang Islam amat luas bidangnya meliputi segenap aspek kehidupan dan semuanya itu telah dijelaskan oleh syara' dan dapat dilaksanakan dalam kehidupan manusia tanpa sebarang kecacatan.

Jika ditinjau dari sudut hukum *fiqh* keseluruhannya dari berbagai-bagai mazhab yang diakui, dapatlah digambarkan betapa luasnya bidang undang-undang Islam. Undang-undang ini menyentuh soal hubungan manusia dengan Allah yang dikenali sebagai hukum *mu'amalat*, soal rumahtangga dan keluarga dikenali sebagai *munakahat*, soal keadilan dan hukuman dikenali sebagai *jenayat* dan seterusnya.

Dalam menghuraikan peraturan yang berhubung dengan tatacara hidup individu dengan individu dan antara individu dengan masyarakat, bidang undang-undang seperti kontrak; harta, jenayah, nikah kahwin dan tort adalah merupakan bahagian undang-undang utama dalam kehidupan manusia. Fuqaha' dalam peringkat permulaan tidak membahagikan bahagian-bahagian tersebut seperti apa yang berlaku dalam undang-undang ciptaan manusia. Ilmu fiqh pada peringkat permulaan tidak menyentuh aspek-aspek tersebut secara khusus bahkan bercampur aduk dengan disiplin ilmu lain. Dengan perkembangan ilmu pengetahuan, pengkhususan bidang ilmu mula berlaku dan dengan ini penulisan ilmu fiqh semakin jelas dan tersusun.

Perkembangan ilmu fiqh telah membawa kepada perbezaan pendapat dan ijtihad dalam mengeluarkan hukum. Perubahan hukum yang berlaku adalah untuk mencapai keadilan dan bersesuaian dengan *maslahah*. Ini kerana perbezaan dari segi fakta, masa dan suasana boleh mendatangkan hukum yang berbeza. Ini jelas berlaku dalam zaman pemerintahan Saidina Umar bin Al-Khattab r.a dan seterusnya dalam pembentukan mazhab-mazhab fiqh.

1.3.1 Fiqh di Zaman Sahabat dan Tabi'in

Kaum muslimin apabila berhadapan dengan pelbagai peristiwa dan kejadian yang belum pernah terjadi pada masa Rasulullah s.a.w, maka ahli-ahli ijtihad akan berijtihad dikalangan mereka serta mengadili, berfatwa dan membuat hukum. Jadi mereka menambah kumpulan-kumpulan hukum yang sedia ada dengan beberapa hukum dan fatwa baru yang mereka keluarkan melalui ijtihad mereka.

Kumpulan hukum fiqh pada zaman sahabat tabi'in terdiri daripada hukum Allah dan Rasul-Nya, fatwa sahabat dan keputusan mereka. Sumber hukum Allah ini adalah al-Qur'an dan al-Sunnah. Pada masa itu hukum belum lagi mempunyai corak fiqh yang luas dan dibukukan tetapi hanya berupa penyelesaian *juz'iyah* (cabang) bagi beberapa peristiwa yang terjadi.

Pada zaman tabi'in dan sesudah itu, iaitu ketika imam-imam mujtahid sekitar dua abad hijrah (abad kedua dan ketiga), orang bukan arab memeluk Islam dan kaum muslimin menghadapi pelbagai peris-

tiwa dan masalah baru, termasuk yang berkaitan falsafah dan teori-teori. Ini memaksa para mujtahid memperluaskan ruang ijtihad serta mengeluarkan hukum bagi kebanyakan peristiwa tersebut dan dibukakan pintu-pintu untuk meneliti dan berfikir. Lapangan *tasyri'* (perundangan) bagi hukum fiqh menjadi bertambah luas malah terbentuk banyak hukum bagi peristiwa yang belum terjadi. Jadi himpunan hukum fiqh pada masa ini terdiri daripada hukum Allah dan Rasul-Nya, fatwa sahabat dan fatwa para mujtahid serta istinbat yang mereka lakukan.

Sumbernya adalah al-Qur'an, qiyas, ijma', ijtihad sahabat dan imam mujtahid. Pada zaman ini telah dimulai pembukuan hukum fiqh di samping pembukuan sunnah dan fiqh telah mengambil corak yang lebih tersusun. Ini adalah kerana disebutkan bersama hukum-hukum ini dalil-dalil, sebab-sebab serta dasar-dasar umum yang menjadi pegangannya. Ahli fiqh digelar *fuqaha'* dan ilmunya disebut *ilmu fiqh*.

1.3.2 Fiqh Sesudah Abad Kedua dan Ketiga Hijrah

Selepas dari masa tabi'in dan imam-imam mujtahid, para fuqaha' pada masa-masa ini lebih cenderung untuk bersikap *taqlid* yang sedar dan mereka berpegang teguh dengan apa yang telah ada dalam fiqh imam-imam yang empat; iaitu Imam Abu Hanifah, Imam Malik, Imam Syafi'i dan Imam Ahmad Ibn Hanbal. Pekerjaan mereka hanya men-syarahkan kitab-kitab daripada imam-imam tersebut, mementingkan alasan, pertimbangan dan pengembangan dasar-dasar mazhab (*usul al-mazhab*). Pengikut-pengikut mazhab pula mempunyai ijtihad-ijtihad fiqh yang berbeza-beza dalam melakukan *takhrij* terhadap pendapat imam-imam mereka. Ijtihad seperti ini disebut sebagai *ijtihad mazhab*. Pada masa ini lahir tokoh ulama' yang tegas dengan pendapat mereka seperti Syekh Islam Ibn Taimiyyah. Walaupun pada mulanya beliau bermazhab Hanbali tetapi ia menyeru untuk berijtihad dan berfatwa menurut apa yang dilihatnya benar dan fatwa-fatwa besarnya menjadi bukti bagi perkataan ini.

Sebenarnya fiqh Islam walaupun ditimpa kejumudan (kebekuan) setelah jatuhnya Daulah 'Abbasiyyah, tetapi ia tetap merupakan sumber

kekayaan fiqh yang hebat. Dunia tetap mengambil manfaat daripada kekayaannya yang dapat mewujudkan keagungan dan kedaulatan.

1.4 KESIMPULAN

Sebagai kesimpulan, suatu resolusi telah dicatatkan pada tahun 1950 di Paris. Bahagian Hukum-Hukum Timur (*Oriental Law*) telah melansungkan persidangan untuk membahaskan fiqh Islam Fakulti Undang-undang di Universiti Paris dengan tajuk *Mingguan Fiqh Islam*. Persidangan ini telah menjemput sejumlah besar ahli-ahli fiqh, profesor-profesor undang-undang dan para orientalis. Akhirnya peserta persidangan bersetuju mengeluarkan resolusi iaitu “berdasarkan kaedah yang wujud daripada perbahasan-perbahasan yang dikemukakan selama “Mingguan Fiqh Islam” dan perdebatan-perdebatan yang telah terjadi di dalamnya, kami memutuskannya dengan jelas:²³

- (a) Bahawa sesungguhnya prinsip-prinsip *fiqh Islam* mempunyai nilai undang-undang yang legislatif yang tidak dapat diragui.
- (b) Bahawa sesungguhnya perbezaan mazhab fiqh dan hukum-hukumnya mengandungi perbendaharaan pemahaman dan maklumat-maklumat dasar undang-undang yang menjadi keajaiban. Oleh itu, *fiqh Islam* mampu menjawab semua tuntutan kehidupan dan memenuhi keperluan-keperluannya.

²³ Abdullah Nasih ‘Ulwan. 1989. *Pengenalan Syariah Islamiyyah; Fiqh dan Sumber-Sumbernya*. Kuala Lumpur: Pustaka Salam, hal. 81.

2

KEISTIMEWAAN UNDANG-UNDANG ISLAM

2.0 PENDAHULUAN

Syariat Islam merupakan ajaran yang dibawa oleh Nabi Muhammad s.a.w sama ada ia berkaitan dengan:

- (a) Pembaikan akidah untuk membebaskan akal manusia daripada cengkaman berhala, taqlid dan khurafat.
- (b) Pembaikan akhlak untuk membebaskan akal manusia daripada pengaruh dan penyelewengan hawa nafsu.
- (c) Pembaikan masyarakat untuk membebaskan umat daripada kezaliman, kacau bilau dan penindasan.

Untuk mencapai semua keperluan di atas, syariah datang membawa suatu sistem sivil yang menyusun hubungan manusia sesama manusia, manusia dengan Penguasa, dan memelihara hak-hak mereka di muka bumi. Kenyataan ini menjelaskan kepada kita bahawa syariah itu terdiri daripada tiga dasar utama, iaitu *akidah 'aqliyah, ibadah ruhiyyah* dan *sistem perundangan kehakiman*. Firman Allah yang bermaksud:

*"Pada hari ini telahKu sempurnakan untuk kamu agama kamu, telahKu cukupkan kepadamu nikmatKu dan telahKu redha Islam itu menjadi agama bagimu."*¹

Antara perkara yang telah diterima dan disepakati oleh ahli fiqh dan undang-undang ialah, setiap sistem yang ada, sama ada yang

¹ Al-Qur'an, surah *al-Ma'idah*: ayat 3.

berasal daripada Allah (*rabbani*) ataupun ciptaan manusia (*wad'iy*) mestilah mempunyai kelebihan-kelebihan dan ciri-cirinya tersendiri. Oleh itu, kita perlu memahami dan mengetahui dengan sebenar-benarnya ciri-ciri undang-undang Islam untuk melihat keistimewaan berbanding dengan undang-undang ciptaan manusia.

2.1 CIRI-CIRI KEISTIMEWAAN UNDANG-UNDANG ISLAM

2.1.1 Ketuhanan (*Rabbaniyyah*)

Yang dimaksudkan dengan *rabbaniyyah* di sini ialah hukum-hukum syariah serta sistem-sistemnya bukan merupakan ciptaan manusia yang diliputi oleh sifat-sifat kelemahan dan keterbatasan. Ia juga tidak terpengaruh dengan faktor-faktor tempat, masa dan budaya serta faktor warisan, iaitu watak dan hawa nafsu. Tetapi Allah S.W.T adalah penggubalnya serta pemilik makhluk dan pentadbir alam ini. Dialah *Rabb* seluruh isi alam yang telah menjadikan segala sesuatu dengan sebaik-baiknya.

Seorang mukmin yang sebenar ketika dia melaksanakan *manhaj rabbani* ini akan melaksanakan seluruh perintah Allah dengan perasaan gembira dan senang hati berasaskan sifat kejujuran serta keikhlasannya. Ini adalah kerana:

- (a) Dia benar-benar mengetahui bahawa Allah adalah Pencipta Yang Maha Berkuasa. Dia berhak berbuat sekehendak-Nya terhadap perihal makhluk-Nya. Manusia merupakan makhluk yang lemah dan terbatas serta tidak berhak berbuat sesuatu melainkan hanya patuh kepada apa yang telah dipilih oleh Allah baginya tanpa perasaan ragu-ragu dan sangsi. Firman Allah yang bermaksud:

*"Dan Tuhanmu menciptakan apa yang Dia kehendaki dan memilih-Nya. Sekali-kali tidak diberi pilihan bagi mereka. Maha suci Allah dan Maha Tinggi daripada apa yang mereka persekutukan (dengan Dia)."*²

² Al-Qur'an, surah *al-Qasas*: ayat 68.

- (b) Dia mengetahui dengan yakin bahawa Allah Maha Mengetahui segala sesuatu. Allah lebih mengetahui tentang hukum-hukum yang disyariatkan untuk hamba-hamba-Nya dan lebih tahu tentang masalah yang diwujudkan oleh mereka. Firman Allah bermaksud:

*“Tidakkah mereka tahu bahawasanya Allah mengetahui rahsia dan bisikan mereka, dan bahawasanya Allah amat mengetahui segala yang ghaib.”*³

- (c) Dia tahu sebenar-benarnya, bahawa Allahlah Yang Maha Bijaksana tentang apa-apa yang disyariatkan-Nya. Maksud kebijaksanaan Allah S.W.T ialah Dia meletakkan sesuatu pada tempatnya yang sesuai dengan bentuk yang dapat membawa kepada kemaslahatan dan menolak kebinasaan. Firman Allah yang bermaksud:

*“Allahlah Yang Maha Mengetahui lagi Maha Bijaksana.”*⁴

- (d) Dia mengetahui dengan sesungguhnya bahawa manusia tetap lemah pada dasarnya dan tidak mampu untuk sampai ke tingkat kesempurnaan walau bagaimana matang ilmu pengetahuan dan tinggi kebudayaannya. Firman Allah bermaksud:

*“Dan manusia dijadikan bersifat lemah.”*⁵

Selain itu, sebagaimana yang telah dinyatakan bahawa manusia dipengaruhi oleh suasana alam sekeliling, hawa nafsu, warisan dan dibentuk oleh akidah yang dianutnya. Manusia juga mudah dipengaruhi oleh kecenderungan tertentu yang berkaitan dengan dirinya. Realiti antarabangsa, persaingan sosial dan pertentangan pemikiran yang

³ Al-Qur'an, surah *al-Taubah*: ayat 78.

⁴ Al-Qur'an, surah *al-Nisa'*: ayat 26.

⁵ Al-Qur'an, surah *al-Nisa'*: ayat 28.

manusia cenderung kepadanya sekarang ini adalah merupakan bukti yang paling nyata bahawa manusia mudah terpengaruh dengan semua faktor tersebut. Akal dan ilmunya adalah terbatas dan ia lemah untuk mencipta undang-undang bagi dirinya walau bagaimana matang dan sempurna dirinya. Firman Allah bermaksud:

“Dan di atas tiap-tiap orang yang berpengetahuan itu adalah lagi Yang Maha Mengetahui.”⁶

Oleh kerana itulah kita lihat bahawa seorang mukmin yang mempunyai pandangan yang matang, faham tentang hakikat dirinya akan segera melaksanakan syariat Allah. Dia bergerak untuk melaksanakan *manhaj rabbani* dengan keyakinan bahawa pembinaan manusia hanya terjamin dengan mengikut Yang Maha Sempurna, menyerahkan diri kepada Yang Maha Suci daripada kekurangan dan berserah diri kepada Yang Maha Agung, iaitu Allah semata-mata. Firman Allah bermaksud:

“Dan (hukum) siapakah yang lebih baik daripada (hukum) Allah bagi orang yang yakin?”⁷

Oleh kerana *rabbani* inilah seseorang muslim tidak mempunyai pilihan lain untuk menerima atau menolak syariah kerana menerimanya adalah tuntutan keimanan dan fitrah seorang insan. Benarlah Allah Yang Maha Agung berfirman yang bermaksud:

“Dan tidaklah patut bagi laki-laki mukmin dan tidak pula bagi perempuan yang mukmin, apabila Allah dan rasul-Nya telah menetapkan sesuatu ketetapan, akan ada bagi mereka pilihan (yang lain) tentang urusan mereka.”⁸

⁶ Al-Qur'an, surah *Yusuf*: ayat 76.

⁷ Al-Qur'an, surah *al-Ma'idah*: ayat 50.

⁸ Al-Qur'an, surah *al-Ahzab*: ayat 36.

2.1.2 Universal (‘*Alamiyyah*’)

Syariat Islam dalam semua hukum, sistem dan prinsipnya mempunyai corak kemanusiaan (*insaniyyah*) dan bersifat universal. *Syariat Islam* merupakan rahmat bagi seluruh alam, petunjuk dan pedoman kepada semua manusia dan jalan hidup bagi semua manusia. Hukum syariah diturunkan bukan untuk kawasan atau puak tertentu tetapi adalah untuk manusia seluruhnya tanpa memandang warna kulit, jenis bahasa atau tempat. Oleh itu, tidak ada perkauman dalam dakwah Islam, tidak ada *asabiyyah* dalam hukum dan tidak ada kasta dalam Islam. Semua manusia adalah sama, tidak ada kelebihan bagi mereka yang berbangsa Arab ke atas bangsa bukan Arab kecuali dengan takwa.

Ciri universal perundangan ini diterangkan oleh Allah dalam beberapa ayat, antaranya firman Allah yang bermaksud:

“Dan tiadalah Kami mengutus kamu, melainkan untuk menjadi rahmat bagi seluruh alam.”⁹

Firman-Nya lagi yang bermaksud:

“Katakanlah: Hai manusia sesungguhnya aku adalah utusan Allah kepadamu semua.”¹⁰

Firman-Nya lagi yang bermaksud:

“Dan Kami tidak mengutus kamu, melainkan kepada umat manusia seluruhnya sebagai pembawa berita gembira dan sebagai pemberi peringatan.”¹¹

Rasulullah s.a.w bersabda yang bermaksud:

“Aku diberi lima perkara yang tidak diberikan kepada nabi-nabi sebelumku. Aku ditolong oleh Allah dengan Dia menda-

⁹ Al-Qur'an, surah *al-Anbiya'*: ayat 107.

¹⁰ Al-Qur'an, surah *al-A'raf*: ayat 158.

¹¹ Al-Qur'an, surah *Saba'*: ayat 28.

tangkan perasaan ru'b (gentar) dalam hati orang-orang kafir selama sebulan, bumi ini dijadikan masjid bagiku dan suci (untuk tayamum), siapa sahaja dari umatku apabila masuk waktu solat hendaklah dia solat, dihalalkan bagiku ghonimah (harta rampasan), nabi-nabi dahulu diutus kepada kaum mereka khususnya sedangkan aku diutus kepada seluruh umat manusia dan diberikan kepadaku syafaat.”¹²

Disebut dalam hadis sahih bahawa Rasulullah s.a.w menghantar utusan kepada raja-raja dan pembesar-pembesar seperti *Al-Najasyi*, *Heraklius*, *Kisra* dan *Muqauqis*¹³ untuk mengajak mereka kepada Islam. Surat Nabi kepada mereka yang bermaksud:

“Dengan ini saya mengajak tuan menuruti ajaran Islam. Terimalah ajaran Islam, tuan akan selamat, Tuhan akan memberi pahala dua kali ganda kepada tuan. Kalau tuan menolak, maka dosa orang-orang arisiyin¹⁴ menjadi tanggungjawab tuan. Wahai orang-orang Ahli Kitab, marilah sama-sama kita berpegang pada kata yang sama antara kami dan kamu yakni bahawa tidak ada yang kita sembah selain Allah dan kita tidak akan mempersekutukan-Nya dengan apapun, bahawa yang satu takkan mengambil yang lain menjadi tuhan selain Allah. Tetapi kalau mereka menolak juga, katakanlah kepada mereka, saksikanlah bahawa kami ini orang-orang Islam.”¹⁵

Antara faktor-faktor *‘alamiyyah* (universal) undang-undang ini adalah tugas yang diberikan oleh Allah kepada umat Islam di setiap

¹² Hadis riwayat Bukhari dan Muslim.

¹³ *Muqauqis* adalah gelaran kepada penguasa-penguasa Mesir pada saat-saat akhir kekuasaan Romawi, dari bahasa Kopti, *Pkauchios*.

¹⁴ *Arisiyn* jamak dari *arisi* bermaksud pelayan-pelayan dan dayang-dayang. Maksud kalimah ini ialah mereka bertanggungjawab atas dosa rakyatnya kerana menghalang mereka menerima Islam.

¹⁵ Ali Audah (terj.). 1980. *Sejarah Hidup Muhammad*. Jakarta: Pustaka Jaya, hal. 456.

masa dan tempat untuk menyampaikan dakwah dan risalah Islam agar ia menjangkau ke seluruh pelosok muka bumi. Allah S.W.T berfirman bermaksud:

*"Kamu adalah sebaik-baik umat yang dikeluarkan untuk manusia. Kamu menyuruh manusia berbuat baik, melarang mereka dari yang mungkar dan kamu beriman kepada Allah."*¹⁶

Firman-Nya lagi yang bermaksud:

*"Begitulah kami menjadikan kamu sebagai umat pertengahan agar kamu menjadi saksi atas manusia dan rasul menjadi saksi atas kamu."*¹⁷

Bertolak daripada arahan-arahan *rabbani* mengenai ciri-ciri universal dakwah ini, umat Islam di seluruh muka bumi bergerak menyampaikan risalah Allah sambil merasa takut kepada-Nya dan tidak ada yang mereka takuti selain daripada Allah semata-mata. Slogan-slogan yang mereka laungkan ke seluruh dunia ialah;

*"Allah mengutus kami untuk membebaskan manusia daripada kesempitan dunia ini kepada kelapangan-Nya dan daripada kezaliman agama-agama kepada keadilan Islam."*¹⁸

Ciri *alamiyyah* ini hanyalah merupakan kesan daripada corak *rabbani* dalam undang-undang Islam. Andaikata penciptanya seorang manusia atau kelompok manusia, nescaya dia akan memihak, secara disadari atau tidak kepada bangsa, kasta dan kepentingan masing-masing. Tetapi penggubalnya adalah Allah, di mana mereka semua adalah hamba-Nya. Tidak ada kelebihan seseorang ke atas yang lain atau suatu kelompok ke atas kelompok yang lain melainkan dengan sifat takwa.

¹⁶ Al-Qur'an, surah *Ali 'Imran*: ayat 110.

¹⁷ Al-Qur'an, surah *al-Baqarah*: ayat 143.

¹⁸ *op. cit.*, hal. 516.

2.1.3 Menyeluruh (*Syumuliyyah*)

Yang dimaksudkan dengan menyeluruh ialah syariat Islam yang tinggi sifatnya ini mencakupi sistem dan perundangan yang meliputi dalam tiap-tiap aspek kemasyarakatan dan kehidupan sama ada yang berkaitan dengan akidah, ibadat dan akhlak atau yang berhubung dengan undang-undang umum seperti masalah-masalah sivil, jenayah, keluarga, sosial, antarabangsa, pemerintahan, ekonomi dan lain-lain. Semuanya itu terkandung dalam prinsip-prinsip yang terperinci lagi bijaksana dan undang-undang *rabbani* yang abadi. Semuanya itu adalah wahyu dari pada Yang Maha Bijaksana lagi Maha Terpuji.

Al-Qur'an sendiri telah menyatakan ciri menyeluruh serta ketinggian prinsip-prinsip dan sistemnya dengan keterangan yang cukup jelas. Allah berfirman maksudnya:

*"Tidaklah Kami lupakan sesuatupun dalam al-Kitab."*¹⁹

Firman-Nya lagi bermaksud:

*"Dan kami turunkan kepadamu al-Kitab (al-Qur'an) untuk menjelaskan segala sesuatu dan petunjuk serta rahmat dan khabar gembira bagi orang-orang yang menyerah diri."*²⁰

Di sini dijelaskan lagi *kesyumulan* Islam ini melalui dalil-dalil berikut yang berkaitan dengan sivil, ekonomi, perlembagaan, undang-undang jenayah dan hubungan antarabangsa. Dalam hal sivil Allah berfirman maksudnya:

*"Hai orang-orang yang beriman penuhilah akad-akad itu."*²¹

¹⁹ Al-Qur'an, surah *al-An'am*: ayat 38.

²⁰ Al-Qur'an, surah *al-Nahl*: ayat 89.

²¹ Al-Qur'an, surah *al-Ma'idah*: ayat 1.

Dalam hal ekonomi dan keupayaan, Allah berfirman yang maksudnya:

*"Hai orang-orang yang beriman, apabila kamu bermu'amalah tidak secara tunai untuk waktu yang ditetapkan, hendaklah kamu menuliskannya. Dan hendaklah seorang penulis di antara kamu menuliskannya dengan benar. Dan janganlah penulis enggan menuliskannya sebagaimana Allah telah mengajarnya."*²²

Mengenai asas-asas perlembagaan, Allah berfirman maksudnya:

*"sedang urusan mereka dimusyawarahkan di antara mereka."*²³

Dalam hal kehakiman Allah berfirman yang maksudnya:

*". . . dan (menyuruh kamu) apabila kamu menjatuhkan hukuman di antara manusia hendaklah kamu menghukum dengan adil."*²⁴

Dalam hal hukuman ke atas jenayah, firman Allah bermaksud:

*"Diwajibkan atas kamu qisas berkenaan orang-orang yang dibunuh; orang merdeka dengan orang merdeka, hamba dengan hamba dan wanita dengan wanita. . ."*²⁵

Dalam persiapan jihad, firman Allah bermaksud:

*"Dan siapkanlah untuk menghadapi mereka apa sahaja kekuatan yang kamu mampu."*²⁶

²² Al-Qur'an, surah *al-Baqarah*: ayat 282.

²³ Al-Qur'an, surah *Ali 'Imran*: ayat 159. Lihat juga surah *al-Syura*: ayat 38.

²⁴ Al-Qur'an, surah *al-Nisa'*: ayat 58.

²⁵ Al-Qur'an, surah *al-Baqarah*: ayat 178.

²⁶ Al-Qur'an, surah *al-Anfal*: ayat 60.

Mengenai hubungan antarabangsa, Allah berfirman maksudnya:

*"Allah tidak melarang kamu berbuat baik dan berlaku adil terhadap orang-orang yang tiada memerangimu kerana agama dan tidak (pula) mengusirmu dari negerimu. Sesungguhnya Allah menyukai orang-orang yang berlaku adil."*²⁷

Banyak lagi kaedah dan prinsip lain yang ditetapkan sama ada dalam al-Qur'an, al-Sunnah, al-Ijma' dan al-Qiyas. Semuanya itu tidak lain merupakan dalil yang nyata bahawa Islam adalah agama dan negara serta merupakan penegasan yang pasti bahawa Islam adalah *syumul* bagi setiap masa dan tempat. *Kesyumulan* Islam diakui juga oleh para sarjana Barat seperti Dr. Moris (Perancis), katanya yang bermaksud:

*"Sesungguhnya adalah sebaik-baik kitab yang dikeluarkan oleh inayah ketuhanan kepada anak Adam dan sebenarnya ia sebuah kitab yang tidak ada sebarang prasangka."*²⁸

Henry de Costrie berkata, maksudnya:

*"Bahawasanya al-Qur'an menawan fikiran dan lubuk hati manusia, dan ianya telah diturunkan kepada Muhammad yang membuktikan kebenaran risalahnya."*²⁹

Alex Loison pula berkata, maksudnya:

"Muhammad telah meninggalkan kepada dunia sebuah kitab yang menjadi lambang keindahan bahasa dan sastera dan dasar akhlak, iaitu kitab suci dan tidak ada masalah-masalah ilmiah yang baru dibongkari atau penemuan-penemuan baru

²⁷ Al-Qur'an, surah al-Mumtahanah: ayat 8.

²⁸ Haron Din. 1988. *Manusia dan Islam*. Kuala Lumpur: Percetakan Watan Sdn. Bhd, hal. 234.

²⁹ *Ibid.*

Pengantar PERUNDANGAN ISLAM

Buku Pengantar Perundangan Islam ditulis dengan harapan untuk memberi gambaran ringkas tentang definisi undang-undang Islam meliputi pengertian fiqh dan syariah. Kerana itu, buku ini menghuraikan ciri-ciri keistimewaan undang-undang Islam dan perbezaan antara syariah dengan undang-undang sivil, dan asas pembinaan undang-undang Islam sejak awal penubuhannya hingga ke hari ini.

Buku ini juga membicarakan sejarah perundangan Islam di Tanah Melayu tempat terawal petapakan Islam, pelaksanaan undang-undang Melaka dan pengaruh pelaksanaannya di Nusantara. Kedudukan undang-undang Islam dalam Perlembagaan Persekutuan juga turut disentuh untuk menerangkan keadaan sebenar undang-undang Islam selepas kemerdekaan Tanah Melayu, dan sejarah ringkas penubuhan serta bidang kuasa mahkamah syariah di Malaysia.

Buku ini amat sesuai dimiliki oleh pelajar di institusi pengajian tinggi yang mengikuti subjek Pengantar Syariah dan Perundangan serta Tamadun Islam. Ia juga sesuai dibaca oleh setiap lapisan masyarakat terpelajar yang berminat mengenali aspek-aspek Perundangan Islam.



Abd. Jalil bin Borham adalah Profesor Madya di Pusat Pengajian Islam dan Pembangunan Sosial, Universiti Teknologi Malaysia, Skudai. Beliau memperoleh Sarjana Muda Syariah (Kepujian) dalam bidang Perundangan Islam dan Ekonomi Islam, Sarjana Syariah (Pentadbiran Perundangan Islam) dan Doktor Falsafah (Sains Mu'amalah) dari Universiti Malaya. Beliau aktif menulis dan telah menerbitkan lima buah buku: *Sains Mu'amalah Islam di Malaysia* (1999), *Majalah Ahkam Johor: Kod Undang-undang Sivil Islam Kerajaan Negeri Johor 1331H/1913M* (2002), *Pentadbiran Undang-undang Islam Negeri*

Johor, (2002), *Majalah Ahkam Johor: Latar belakang, Pelaksanaan dan Komentari* (2002), dan *Ahkam Syar'iyah Johor: Undang-undang Keluarga Islam Kerajaan Negeri Johor 1935* (2002). Kelima-lima judul ini diterbitkan oleh Penerbit UTM.

Penerbit
UNIVERSITI TEKNOLOGI MALAYSIA

ISBN 983-52-0276-1



9 789835 202766